

余山

山

集

續

集

西江遊草序

盱江徐芳撰

伯牙學琴于成連至蓬萊之山刺船而去伯牙心悲但聞海水蕩滴羣鳥悲號仰天歎曰先生將移我情崑崙崑崙學琵琶于段師段師曰本領何雜又曰使崑崙不近樂器十年忘其本領然後可教夫詩者忠臣孝子之怨慕壯夫烈士之悲吟山川今昔友朋聚散之感慨其中有所激發不得不形諸咏歌尤情之深者也古之善言情者莫如陶彭澤杜少陵白香山其詞淡樸真至使人無不可解而卒不可到其所以然非一日之積也彼先有孤超曠絕之懷渾灑靜深之力忠孝狷狹礪礪不可自抑之性沉蘊于中隨所遇而取之人不能至而我至

焉此所謂本領也本領先劣而徒于聲響字句之間敲
戛以求一當非艱則媿而情鬱矣或故張以蔓艷剽綴
之言而情乃益遯此一藝之士所卑笑者而欲自命爲
詩古無是也吾友方爾止以文名天下有年其于詩獨
好彭澤少陵香山而摹擬之予嘗讀其燕遊魯遊二集
淡樸真至居然一香山也近又集其辛丑一歲所作爲
西江遊草約二百首夫爾止之于吾江所遊者惟南九
臨贛四郡耳何詩之多如此旣而思之吾江之于諸省
際變同而受旤異其斬艾燔灼垂十數年始定定而枯
瘠之遺摧殘憔悴尚未已也捫滕王之故墟骨餘白焉
弔潯江之崩流血餘赤焉溯十八灘之峭嵒嶽崎山餘
青而水餘綠焉比之蓬海此亦窅冥汨沒鳥號心悲之

候也爾止以其羈孤落拓之身忠孝壯烈之性遇友朋而纏綿遇山川而愴嘆其于情之移亦已至矣二百篇猶嗇也顧疑其多乎夫其不能不詩者情也其詩之所以超然獨到者非一日之情爲之生平之本領爲之也嗟乎爾止以跣跣不羈之才使其黽勉于世功業可立就顧其自放廢百折不回雖作爲文章其致止足自娛而已此歐陽公序梅聖俞詩所云世徒喜其工不知其窮之久而將老也而爾止浩浩焉若將終身者蓋天將縱爾止以詩使與少陵香山諸賢爭千古也復何恨哉爾止爲予同籍密之諸父行密之戌冬訪予山中因止盱眙間當爾止西棹時予以拜馬素修先生墓往錫山不克偕今歸有日矣密之且與予有結茅簫曲之約

爾止能重往乎入三谷而探紅泉石磴之遺登麻姑壇
尋魯公碑坐方平話滄桑處其于移情當更有進于江
上琵琶閣中帝子者予將懸江遊續草之目待爾止矣

西江遊草序

薊門周體觀撰

夫學者有志於當世之務鬱而未發形於詩歌抒瀉激宕翹然以才自見讀者感焉若夫遯世無悶之士獨行高尚外無所慕一彈一咏性情自樂而已苟其中有幾微未平而太上無徒間雜風刺閉門木榻絕俗而立君子亦病其用意之未廣也僉山方子爾止少有重名博通六籍多所著述而尤篤好風雅富於辭翰氣岸軒豁議論縱橫不可謂非有志於當世之務者迨中更不造貌腴神傷毅然息焉十餘年來確乎不拔雖古石隱之士未有果於此者然於朋友之情江湖之興固未衰也每一出遊其所爲詩動盈卷軸要皆標舉興會陶寫性

靈怡然順理渙然冰釋絕無哀怨激楚之意而一歸於
潛德之音善乎其自處夫才與遇也戊戌冬自燕薊歸
有北遊草以續於禽山集之後論者比於少陵夔州香
山洛下之作庶幾近之矣己亥春客彭城秋客西陵則
有徐杭遊草庚子之兗州則有魯遊草辛丑之豫章則
又有西江遊草會是時予官南昌爾止見訪留予署者
旬月遊覽贈答之作曲盡其妙已又去蕭灘入虔州與
施少叅周司理輩互相唱和其詩益多樸而不率豪而
不麤悲而不傷怨而不怒真得風人遺意予讀之不獨
歎其詩之工更歎其作詩之指爲不可及也因題數言
於其簡端

西江遊草序

大梁周亮工撰

古人爲詩未有舍性情而專言格調者今人好稱格調而反畧于性情此詩之所以不古也夫詩以言性情也山澤之子不可與論廟堂華曼之詞不可與言顛顛其情殊也今無與于頌述而黼黻其貌本無所感慨而涕泗從之以不情之悲喜爲應酬之章句所謂鞞鐸之不中于音也而挾其行卷詡然曰我盛唐我六朝也余竊惟之而世俗之見鮮與余同惟吾友方子爾止其論詩與余最合蓋余聞爾止之言曰三百篇尚矣屈宋而後足以追蹤繼響者惟漢人樂府今觀其戰城南陌上桑孤兒病婦諸行以及焦仲卿妻等篇指事屬詞微言托

諷爲後代高曾之規矩而少陵香山其源皆出于此雖
氣格聲響不能畫一而風旨所歸先後同揆期于聞者
足以感動而後止卽有善析者不能岐兩家而使之异
轍也而耳食之士遂以少陵獨步非香山所可幾豈足
爲通論乎今使世之爲詩者苟能推白之坦逸以合于
杜之雄渾開闢頓挫自爲一氣方足雄據作者之壇若
夫摘裂字句補湊成章至於前後易置不可致詰卑卑
不足道也爾止之論與余合若此爾止之詩初出猶爲
人所驚恠越數年而漸習又數年而玉叔尚白與余輩
後先倡導之而爾止之教遂大著於天下茲西江遊草
出其爲海內所尊信而誦服無疑矣固無俟余贅獨異
爾止根蒂前古發之詩歌爲于舉世未爲之日而一旦

翁然從之苟非有深識定力當羣議而不撓烏能卓然自立成一家言乎余故舉其所論少陵香山之合者如此以見詩人之卓然自立能成一家言者中必有所挾持非泛然而爲之也

龔山續集

西江遊草

皖桐方文爾止著

孫枝蔚豹人

同學

紀映鍾伯紫
潘陸江如定

范良麋生

五言古體

寄懷濟寧楊聖喻兼寄令弟聖美聖企

我歸自洛州取道於涉陽是時任城外雪深三尺強下

馬不能立手足凍已僵且莫入官署

是時從子蛟
峯備兵于濟

假寓

山僧房此地雖寡交素心有三楊相送來河干各賦詩

一章其言悽以惻其氣慨以慷稱我老詩人慚愧何敢

當明且卽分手揮鞭去江鄉驢背吟此詩春風動微茫
因思平生友各在天一方山川逾千里安得同匡牀不
如銜泥燕歲歲巢君堂

題王望如白雲書屋圖

屋在刑部獄中

白雲是何所乃有讀書屋良以素心人爲學恐不足少
年游菰苑明敏冠羣族中年官士師平恕緩百福豈知
慎刑者反自罹刑獄私心本無愧何患乎桎梏隨地結
茅茨當牕種花竹中藏書百卷曉夜時時讀生死了不
關神情澹而穆一朝筮雷雨解網還山谷翻憐此屋空
誰可繼芳躅黃生爲作圖濟叔風景長在目從此青溪畔
高齋肆遐矚只恐鸞鳳姿焉能久雌伏

施尚白少叅社集秦淮分得來字卽送其之任臨

江

長夏久無雨，猷澮生黃埃。何況都市中，車馬轟如雷。惟
有古青溪，一水尚滌澗。使君適遊此，俯仰懷抱開。向夕
乘涼風，嘉會羅羣才。放艇入中流，已復登層臺。謂言今
夕聚，明旦吾將回。八月泛星查，直至彭蠡隈。把酒不須
吏行矣，舟人催洪都。未云遠秋盡，予亦來東湖。與南浦
或可相追陪，良晤雖有期，惜別仍徘徊。

江行卽事

我從白門來，買舟一葉輕。微風牽百丈，頗愛秋江晴。夜
半雷雨作，危濤使人驚。岸傍有巨艦，所載鹽萬贏。因乞
附其中，柁樓寬且平。無風旣不動，風小亦不行。留滯荒
江邊，五日難爲情。回看諸小艇，揚帆各前征。况藉篙槳

力日進百餘程我何取賈船務大徒虛名仍呼小艇去
早至潯陽城

過彭澤有懷董澹園明府

吾與董明府平生未謀面不知何因緣彼此情繾綣往
歲舍弟思江臯偶相見開口卽問子并問子所撰自言
企慕久無緣共芳醺最愛龔山詩手錄成一卷每日訟
庭閒高吟十餘徧是時我北遊孤蓬隨風轉此語絕未
聞星霜凡幾變今秋晤舍弟始道君深眷雙鳧旣已歸
尺鯉何繇薦江行至彭澤是君所治縣遺惠在人口媿
媿談不倦我獨感知已臨流淚如霰

南昌訪周伯衡觀察

二首

方春理桂楫江上雲陰陰一夕風雨作兩岸泥塗深追

送已不及馳思勞我心仲夏倪生歸聞公傳聞多好音官齋無俗事坐臥惟高吟冰雪淨君懷豈肯同塵襟平生敬愛客風雅道自任所以老布衣千里來相尋

前年桃葉渡贈我蠻花詩中有南州句共醉且勿辭公昔

見贈有且同吾子醉南州之句今果至南州斯言若先知况復施與宋

尚武同官俱在茲才力各強健三人必有師所願出名

酒痛飲黃花時或登滕王閣或訪澹臺祠但恐俸錢少延賞無其資

寄藥地上人即從子密之

自公去盱江三年音信斷今春徐子來仲光云在廩山半

學道既已深著書復無算所惜山中陋罕與質疑難長

江二千里烟帆影相亂我欲往從之逡巡每嗟歎九月

來彭蠡卽問盱江船不圖章門外忽逢僧塔然僧之自言藥地徒本師將南旋廬山歸宗寺後有玉簾泉向陽一小樓可以終餘年審爾宜趣駕不必更遲延

廬陵趙國子

巖

讀李太虛先生召對錄悲其言之

不用作五言排律百韻弘瑋瑰異洵詩史也予欲取而註之并刻以行世先成三十韻書其詩

後

甲申三月中妖星犯辰極司馬不知兵 天子憂形色獨有李中允抗言利遷國 祖宗建皇居原不限南北六御如飛龍兩京爲羽翼况乎親征事歷代有典則赫怒整王師小醜滅始食豁達 二祖風慎勿拘繩墨是時 聖心動翠華將南陟一日三召對安危在頃刻

腐儒昧通變封章反見劾卒致都城陷 國君徇社稷
漢祚遂中移追悔不可得假使用其言奚至有改革當
時左右史簪筆侍 上側記其召對語詳盡頗不忒慮
陵草莽臣讀之深歎息奮筆作長句忠憤吐胸臆自古
亡國者往往多失德豈有堯舜君反困於盜賊人心恨
難平天意窅莫測始悟中允言展矣萬夫特詩成累百
韻序次得其寔音韻復和諧比偶亦修飾苟非曠世才
焉有此鉅力但其義精奧淺學罕能識我欲爲之註觀
者庶免惑尋當授梓人永爲詞家式卽此一篇詩足以
傳趙疑

詩云克岐克嶷
音逆今在職韻

贈章翌茲司理 二首

天崇運方盛文事日已靡聰明才辨人波譎復雲詭於

潛章先生曠代自興起能以古文法揮斥聖賢理圭方
而璧圓妙絕無與比後生誦其文往往竊青紫君獨困
林泉陸沈逾二紀頃乃迫功令一官授司李雖曰溷風
塵此志白於水天下同心人諒其不得已

神交二十載企慕非一端所以燕市中一見如舊懽爲
題抱鴛圖字字青琅玕但恨馬蹄促不得久盤桓聞君
遊敝里我先去河干漁樵辱垂問傳聲至江湍今我遊
南州失路多嘖忼偶於宗伯坐李太虎先生相逢話艱難顧
念無衣客朔風淒以寒豈不望綈袍欲語心悲酸

贈趙千門司理

昔我遊京師出塞訪吾友吾友來使君王叔昕夕共杯酒
爲言趙千門才調世罕有風期復散朗稱贊不離口我

心儀其人恨未獲聚首豈知趙子來卽在我行後風塵
暗相失惆悵爲之久今年客南州君適官江右班荆話
疇昔神交諒非偶不知詩酒興能如使君否

十八灘

昨歲遊泰山曾上十八盤今歲遊虔州又上十八灘盤
險恃輿夫輕雲度危巒灘險恃舟師亂石壅奔瀾二百
四十里如行戈劔端舟師稍不愼大小皆摧殘以此懷
戒心寢食弗敢安順風亦三日乃始至儲湍一作潭在贛州西北
二十里回思所歷處尚令毛骨寒牲酒謝神明同舟人盡
懼

留別周計百司理二十韻

我來章貢城作客二十日日日日飲君酒言笑何款密官

舍鑠重門不醉不得出此地良足懽無奈歸去疾君聞
我歸去惆悵若有失華堂夕開燕所召皆吾匹吹笙復
鼓篁彈琴又弄瑟未忍輕別離雞鳴燕始畢嗟我蓬蒿
人少小富文術結交半海內虛名過其實老大竟無成
慚愧江淹筆世情慕榮顯誰肯敬隱逸今秋南浦游飢
困人莫恤邂逅遇君子傾蓋成膠漆邀我來虔陽同舟
且促膝縱談詩與史契合諒非一更念客遊苦分金至
四鎰勸我勿孟浪還家置側室晚歲生佳兒庶可安衡
泌感此高厚情揮涕難具述

生米潭寄懷尚白少叅

以下壬寅春作

蕭灘分手時期晤章江渚我辭歸櫂急恐不能待汝豈
知沙洲外春水纜尺許舟重易膠淺累日空延佇聞君

官舫來相望不得語推挽借衆力帆檣始一舉私喜且
晚間可以慰羈旅及至生米潭又被風濤阻去年君過
此云亦遇風雨懷我作長句其言妻以楚我今吟此詩
篤念同心侶安得似田家長年共雞黍

江上晤劉遠修卽送其遊山東

時兗州少府王自
牧邀遠修偕往

憶昔槁木師送我楚江上同行者二子遠修與希亮抱
衾宿舟中未別先惆悵感此深厚情十餘年不忘槁師
旣已寂二子幸無恙思君老且貧孤蹤獨飄蕩江干忽
相遇驚喜殊過望世亂何所依主人最高曠相將去濟
州海嶽恣所向南池秋色佳我來共酣暢

將近樅陽舟中遣興

孟秋江右去仲春江右還客行四千里始見樅陽山樅

陽無我居居在秦淮間過此復五百方能抵柴關年齒日已邁鬚鬢日已斑何爲貪遠遊所歷多險艱今歸衡茅下身倦且休閒時蔬與種藥聊以駐衰顏

浦口過江

虔州去金陵二千三百里涉江雖云遠順流亦易爾但遇西南風旬日卽歸矣我歸自章江歲暮朔風起况聞章門外兵馬多如螳私心懷百憂行行復止止因循至春仲始泊烏江渚此地屬和陽還家路無幾半日波浪平可以見妻子那知春雨作北風吹不已舍舟而登陸揮鞭逐長耳浦口又逢兵洶洶奪行李江船莫敢渡假寓茅菴裏中宵憂轉劇輕裝四五徒雞鳴起漁舸曉渡空江水

七言古體

文德橋步月

青溪夜半涼風發，獨步溪橋看明月。
月下何人吹玉簫，含悽吐怨聲初歇。
憶昔年少來金陵，兩岸樓臺千百層。
瑤笙錦瑟家家曲，畫舫珠簾夜夜燈。
如今未及三十載，城市蕭條風俗改。
居人對岸悄無譁，月色波光似烟海。

東林茂之先生

八十二翁筋未衰，往來都市如童兒。
尋常過我草堂慣，今年暑月何愆期。
因兩髀患剝癬，出門徒步多艱危。
周公勸用楮桃葉，不識此方宜不宜。

周元亮司農以楮葉治癬云有奇效

答施尚白少叅見訪之作

去年我向歷城遊，嶧華二山沈灤二水恣冥搜。
到處見

君所題石高風逸韻垂千秋今人仕宦惟干祿山水詩
文意不屬卽令逐隊憇林泉那有篇章賁巖谷使君夙
負天下才睥睨一官如浮埃平生篤好在山水但聞名
勝心顏開前年視學來東土星軺歷遍齊與魯瞻懷古
人求遺蹟廢者重興闕者補及登泰岱觀滄溟夜半日
出光熒熒登州蜃市更奇絕老坡未許誇仙靈以此新
詩數百首登臨贈荅無不有嶽瀆藉以生光輝豈止芳
腴膾人口我讀君文誦君詩停雲千里長相思春鴻秋
燕每不值曾託芹溪蔡四翁也爲致詞今年君目武林返訪
我衡茅不辭遠貧交本是廿年前此日重逢猶恨晚明
朝便欲去匡廬聚散匆匆意不舒二孤五老昔所賞茲
行游泳當何如我有故人權溢渚欲往從之罕儔侶樓

船倘肯附遺民一路雲山供笑語

崔計部正誼
方推九江關

烟水亭歌爲崔正誼計部作

九江城北江水橫九江城西湖水平湖中央有古臺在
臺之四面烟波縈昔賢於此構亭子遠眺廬山近湓水
羣公暇日攜賓客置酒遊觀信爲美左帥兵從武昌來
千萬人家化劫灰此亭隔水幸未燼棟宇摧殘亦可哀
又十六年壞已極仕宦何人肯修飭榷關使者崔大夫
過此停車三嘆息慨然捐俸百金餘立召工師來拮据
旬月頓還其舊制秋晴開燕臨前除我往南州泊江渚
訪君官舍淹行旅詰朝與客登茲亭石門雲屏咫尺許
是時江上紛捉船使君開賦虧不全高情豈肯同俗吏
黽勉從事湖山邊假令充裕如疇昔定知到處搜遺蹟

香爐草堂久凋落庀材重建君豈惜重建草堂事誠難
琵琶亭址在江干但能修葺如烟水長與詩人來往看

東湖行

南州古蹟非一處惟有滕王閣最著滕王唐祖之從子
其性驕淫虐民庶當時建閣亦偶然豈知輪奐垂千年
祇因王勃一開燕遂使閣與詩並傳金聲桓變遭回祿
撫軍蔡公重修復章門遊者誇勝槩獨我來觀意不屬
南昌城內有東湖湖水澄泓似畫圖昔賢徐子暨蘇子
皆於此地稱潛夫二子高風峙千古舊宅依稀莫可覩
湖心曾構孺子亭湖干又築雲卿圃先是仕客來南州
鮮不攜酒東湖遊一從兵燹亭圃廢因循十載無人修
郡縣有司旣草草邦人好事者亦少高樓廣廈諒難成

種樹編籬寧不好豈有下陳蕃榻之徐孺子却張浚幣
之蘇雲卿反不如奪典籤妻之李元嬰

新唐書滕王元嬰傳王都督洪

州時聞人妻美則以妃命召而逼之典籤崔簡妻鄭氏不受辱孤其面破王慙旬月不出

霜螯行

少年嗜蟹有奇癖每啖能兼五六十當時蟹賤酒亦多
日日高朋紛燕集中年世變心憂煎食量漸減不如前
恣啖猶能二三十所恨囊空無酒錢卽今五十平頭過
脾弱僅能啖十箇其價日增錢日少老饕不厭愁無那
况復移居石頭城此方所產瘦而輕暮秋時亦供匕箸
稍稍染指難爲情今年九月客江右水鄉鱗族多無數
中間紫蟹大而肥漁人誇是經霜後青錢三百買十匡
剝取脂膏丹且黃左手持螯右手飲三焦積熱爲清涼

只是平生惱獨酌一杯亦喜人酬酢南昌俗儉交又寡
所以賓主長落落寄語故人倪閣公莫將官舍比樊籠
秋晴步趾來吾寓判把霜螯對菊叢

陳士業讀書樓歌

章江門外江水流上有二閣凌高秋二閣之間復有閣
是爲陳子讀書樓陳子先世家城裏嵯峨甲第連雲起
一從世亂化爲烽別構茅堂傍江水數年始建此樓居
軒豁寬平好讀書春雨秋雲憑眺望水光山色浮牕疏
我來訪君上樓坐無數烟帆眼中過須臾酒饌出貧厨
竟日淹留相唱和方今世路多險艱幾人環堵得安閒
君家有此卽仙窟不必更羨蓬萊山

李太虛宗伯招同黎左嚴學憲飲陳士業徵君讀

書樓用王子安體限樓字各賦詩三章

南州何處堪游泳滕王鈞天二閣並二閣高華雖可觀
無如扁鑰兵爲政中間別有讀書樓萬壑千峯在上頭
主人好客時招集不必重尋二閣遊

陳子結交遍海內同鄉轉少同心輩蘇萬劉徐俱不存

蘇武子萬茂先
劉士雲徐巨源

李黎二老猶相對我到章門訪舊遊因

之攜手登茲樓莫道閒吟是偶爾他年邑乘垂千秋是時

士業修南昌
志將采入焉

李先生是文章伯黎先生亦神仙客鳴珂不忍話當年
舉杯且共延今夕江上漁人弄小舟烟簑雨笠自風流
憑他斗大黃金印不換元龍百尺樓

新塗訪施尚白少叅

九月送君蕭水去期我十月來樟樹地名我來君又往金
川馬首相逢太勿遽猶喜黃昏入署中張燈把酒話飄
蓬雖然分俸無多少古意慙慙自不同

南風歎

天道難明有如此冬月南風發不止我溯章江入贛州
八日纜行三百里聞說前途更險艱此時不到何時還
若能轉棹隨風去千里金陵咫尺間

初至虔州遇黃伯圓卽送其歸南昌

憶昔玄冬客番湖與君除夕醉屠蘇開春三日卽分手
曾爲我作廬山圖筆精墨妙今尚在但恨離居將十載
忽漫相逢章貢間年鬢雖衰顏未改奈何我到君又歸
攜酒江頭送落暉臨行留戀不忍別重寫龔山老布衣

是日伯圖爲
予作若吟圖

贈高淑觀明府

高君釋褐十五年兩宰大邑閩與虔同輩紛紛至公輔
君猶踳躑久不遷束帶何慚見鄉里且看南方好山水
幾番欲賦歸去來文法拘牽不繇已一朝騎馬章貢城
與我乍見肝膽傾自言夙昔有神契况兼累世多交情
是時歲暮天雨雪忽忽聚散愁堪絕稍晴期上鬱孤臺
痛飲狂歌莫輕別

就亭歌爲尚白少叅作

湖西分司使君署乃在城東最高處俯瞰蕭江水雲
遙望閩山烟裏樹使星本是少微星雖居官舍風泠泠
既倚芙蓉結爲屋又取篔簹裁作亭世人鮮不愛華廡

高人視之同糞土石崇金谷祇須臾葛亮草廬自千古
厥名就亭意云何取其簡易不煩苛使君爲政亦如此
日日亭中聞嘯歌

題半山禪客卷

前題者爲蕭尺木孫豹人杜于皇
許天玉王王貽上陳伯璣龔半千

羣公一卷冰雪辭持贈者誰半山師半山往往向人歎
此中獨少方生詩何意蕭灘與我遇僧房茶笋日相聚
江淹無以擬湯休怨別聊爲碧雲句

除夕歎

去年除夕歸自北行李到門天已黑今年除夕客南方
江路逢兵歸不得山妻凝望眼將穿只道今年似去年
高樹夕陽鴉影亂尚同小女立門前

五言今體

和龔孝升都憲送周元亮司農南歸韻 十首

白門春尚早新柳未藏烏地僻朋儕少年衰意與孤懷
人在縲紲何日返江湖仰首雲中鴈歸心托寸蘆

柴荆微雨過有客道君還我正愁臨水聞之喜動顏好
風吹馬首計日到龍關江上春陰久初晴見遠山

秦淮曾卜築來往盡詩人自入燕山去鶯花寂不春那
知今襖日忽返舊吟身家破仍餘酒酣歌勿慮貧

釋褐年方壯俄驚頰白時宦遊多瘴海勛伐著蠻旗節
與松筠並讓從貝錦爲纍臣心不懼自有鬼神知

聞君廷讞日天眼劃然開匝地狂風起迎春淑氣迴始
明投杼誤爭歎濟川才只恐徵書促難容隱釣臺

草閣臨桃渡，迷名學灌園。與君居密邇，無事日過存。雞
黍花間酌，風騷燭下論。藏書千萬卷，對客任掀翻。
杖藜南郭外，一徑入山斜。古寺尋高座，香臺傍雨花。哲
人偏化鶴，風樹每啼鴉。寂寂禪房裏，猶停廣柳車。
孟夏初弦月，先期弧矢懸。思親惟禮佛，謝客且迴船。無
計長溫清，過時尚粥餽。節哀聊自慰，祿養已多年。
憶昔庚辰歲，文章聲價饒。腐儒曾月旦，良晤各風飄。萬
事餘衰鬢，重逢話舊朝。問年俱半百，春酒不須邀。
君出都門日，誰無遠送情。河梁詩十首，高唱自龔生。精
衛心元苦，馮夷氣不平。南歸多和者，俗眼漫相驚。

贈羅原村

原村何處是，乃在黃山西。君昔家於此，終身懷故谿。王

維詩裏畫羅隱客中棲草樹年年長歸時路恐迷

摩詰有時

倚簷前樹遠看
原上村之句

秋至樅川

六年江海客今始到山家望壠知松樹穿池見蓼花遊
蹤仍未定詩思浩無涯笑指雲開處青峯是九華

八弟退谷聞余歸枉步湖上留別

四首

昨爾來江國先期我去淮不能同桂棹獨使寓茅齋及
往濟州署又遊洛水涯所差俱一日處處惱人懷
今秋歸故里不喜入山城相約出郊晤欣然冒雨行六
年添老態一夕慰離情絮語那能盡村醪緩緩傾
枕被雖同宿明朝奈別何却憐時促迫轉望雨滂沱喪
亂田園少飄零感歎多白頭老兄弟安得聚烟蘿

彭蠡吾將去
茗溪爾亦游
檣鳥風上下
江鴈信沈浮
作客誰先返
干人勿久留
歸時過草舍
重與醉新篍

中秋夜泊望江

屈指今宵月
潯陽官舍中
故人應對酒
客路尚飄蓬
江水浮蟾兔
雲沙落鴈鴻
不知崔計部
清讌與誰同

九江訪崔正誼員外

四首

昔弭淳湖櫂
曾遊仙令門
高文獨相契
嘉貺一何繁
始至情偏篤
重來義更敦
自慚魚與雀
猶未報人恩
小別十餘載
無因寄片鴻
每懷霄漢上
長入夢魂中
奉使江州遠
揚帆楚澤通
相過一相問
豈直爲途窮
東南山水窟
奇絕是匡廬
下有郎官署
真成島嶼居
平生與不淺
登眺意何如
栗里吾遊慣
還期覓笋輿

往年關使者會計不須愁此日商民困能無稅歛憂濟
川才自裕垂釣客何求心事憑尊酒秋江卽溯游

九日飲周伯衡憲副署中同倪閣公作

八首

四時分節序九日最含辛况是飄零者兼之風雨晨登
高難着屐獨坐欲沾巾幸有周觀察連朝作主人
主人能愛客客亦竟忘歸設酒多無算談詩妙入微曉
雖牽吏事夜必造書幃坐久不知倦霜寒但授衣
倪子富文藻讀書官舍中人師真不忝老友况能同抵
足話深夜驚心聽朔風西江有歸夢一路向江東
白門逢九月無處不黃花此地菊偏少當簷種也嘉高
齋聊過目失路倍思家既有東籬在何爲天一涯
歲稔猶艱食那經年又荒南州米價賤遊子棹歌長薄

命如鴻鴈謀生只稻粱九江來幾日又欲去虔陽
十月陽生後聞君亦渡河此時寒已甚去日雪尤多雖
輯蠻方玉仍愁宦海波不如外臺使江上聽漁歌
年事至重九如人漸老時霜前催木葉菊後少花枝晴
煦權猶減陰寒愁可知祗應對風雨爛醉復吟詩
詩思入秋好佳辰安可無但能吟蟋蟀不必佩茱萸自
顧顛狂態渾忘貧賤軀非君敦古義誰與慰窮途

旅夜

客舍已凄苦况聞風雨聲一杯消永夜孤燭坐深更飢
鼠分行出寒雞失次鳴此時心眼靜歷歷悟浮生

信至

家人書信至望我早歸來尚欲雙江去

章貢二水合于虔州謂之雙江

那能十月迴廩無終歲粟妻有治生才門外多蔬圃辛
勤刈且栽

新淦訪施尚白使君一宿而去

白門曾折柳相約至蕭灘不料催科急空令羈旅歎酒
杯仍嬾姘書札亦琅玕是時尚白按各屬徵逋賦不能留客寫一長卷贈予更向

虔州去歸來歲已殘

纔收那顧淚

子貞與治

又滴蔡生墳

芹溪

挽句舟中補哀聲野

外聞

尚白舟中作哭芹溪詩詩畢大慟使人驚愕

繭絲看入

尚白許芹溪繭絲未與至

是取以

宛雅許鐫文

宛雅乃宣城前賢詩文今以蔡作補入

此事今人少

高風併在君

哭蔡芹溪

四首和施尚白韻

老友十年別去秋來白門披帷先下淚把酒各傷魂頗

訝見遺句渾如永訣言壁間詩果識重讀暗聲吞

仲夏響山至

司村

傳君臥在牀老猶貪麪藥病不廢詞章

有室妬偏壽無兒繼亦殤祗餘三歲女提抱哭身傍

憶昔辛壬歲

辛巳

嘗同宛水舟梅徐相唱和

善生

麻沈

亦淹留

孟璿

四子俱黃壤唯君到白頭那堪又凋謝淒

絕敬亭秋

平生肝膽重世態總浮雲一死交情見無如施使君衣

酬吳子劔書輟郢人斤况是吟聲苦悲涼不忍聞

過十八灘

正愁舟楫險又復上危灘霜月水初落炎方冬不寒家

貧惟仗友世亂敢求安况有同心客村醪夜夜懽

贈畢仲青郡丞

郡齋兵燹後零落似荒村君到始重闢樓成復有園一

亭明月小千本素華繁日日招賓佐香光撲酒尊仲青白開

樹舍東編種茉莉數千本
作亭其中以待客故云

南方珍抹麗

茉莉一名抹麗謂
可抹殺衆芳也

嘉種聚於斯偶入衆香

國惜非三伏時高堂名暖雪

卽仲青
堂名

痛飲對華滋木本

金陵少歸舟乞一枝

荅曾庭聞孝廉見贈

魯江曾載酒送爾去西秦本是茹芝者今爲折桂人貧

難安隴畝亂且溷風塵名易心無改

庭聞舊名傳
燈今名晚

相逢

感歎頻

別後同漂泊傷情是悼亡贈子詩八首對爾淚千行庭聞

詩云才收亡妾
淚又灑舊神京

冒雪來章貢先春返建康懽娛纔幾日

惆悵又鳴榔

施尚白使君書來却寄

江關風雨夜正是憶君時忽有雙魚至其中數首詩霜
天憐隻影歲暮促歸期感此纏綿意增予伉儷思

尚白見懷

句云子有賢妻可併
隱忍使霜天各孤影

虔州將轉權蕭水必經過小泊入官舍新詩與和歌既
知時晚晚不敢恨蹉跎加惠無窮已貪婪愧若何

壬寅初度奉酬尚白使君

起皆用杜句
亦一體也

元日到人日栖栖官舍中稱詩懷抱合望古詠歌同律
細頭應白更深燭尚紅來朝置春酒又欲壽衰翁

百年已過半萬事總辛酸簪紱非吾分箕裘何獨難食
貧勤婦女畏甌忍飢寒但得熊羆夢餘生稍自寬

歲暮遠爲客開春猶未歸
祗應兵馬阻遂使室家違
短棹停蕭水華筵愧舞衣
對人雖強飲飲罷却歔歔
海內文章伯聲詩妙絕倫
識途憐老馬琢玉恕工人
交道從來厚名言只是真
他年君不朽吾亦附千春

正月晦日守風生米潭

久客渾無賴言歸及早春
那知入正月又復過三旬
沙淺膠舟易風狂鼓浪頻
年來多失意處處有遭屯

南浦歸思

章門三十里欲往尚艱難
何況異鄉國焉能生羽翰
我家桃葉渡此日杏花殘
芳徑無人掃停杯飲不懽

寒食泊東流

江上朔風急孤舟不敢移
况逢寒食雨更覺客心悲
鄉

國經年別家人待米炊歸途偏阻滯安得救朝飢

送沈治先歸宛兼寄令兄眉生

秋江同作客春水又同歸何事栖遲久仍嗟生計微對
牀聽夜雨把酒問漁磯坐惜沙邊鳥乘風忽背飛
賢兄真處士抱道隱深山人世空相憶雲鴻不可攀舊
交多白骨辛苦老朱顏獨有鴿原好今年又出關

泊西梁山有懷舊遊

江北多奇士無如戴敬夫詞源通屈賈書法擅歐虞家
與天門近身隨國運徂平生交不淺感動獨長吁
故人魯孺發早歲隱天門一命去荆楚終身懷國恩專
征曾秉鉞垂死復歸園澤畔行吟處重過欲斷魂

七言今體

苦雨東蕭伯闇孝廉

積雨經旬土銜荒因思頭白老蕭郎
畸懷不肯干人祿薄俗誰能餉爾糧
一卷殘書消永夜數竿修竹倚斜陽
虛疑令弟高州守近日空槭亦渺茫

伯闇弟慶九方守高州

送陸漢東孝廉歸粵并謝其贈研

當年東海受殊恩此日無端走薊門
一到黃河催轉櫂重來白下暗傷魂
江樓送客逢春雨石硯遺予帶墨痕
別後摩挲鸚鵡眼長如良友共朝昏

蕭伯闇家移竹

小圃修篁數十竿兵兒一過總摧殘
情知此物生元易偏到吾家養去聲亦難
粉籜又從鄰友乞霜鋤須趁雨天

寒明年便有龍孫長索酒來將竹母看

荅黃波民見訪之作

一月春陰黯不開蕭條三徑長莓苔墻東始見朝曦出

竹裏俄驚道友來破戒有詩真妙絕

波民自言久不作詩今爲予破戒

留懽無酒却空廻碧桃紅杏垂垂發期與林翁共舉杯

林茂之先生也

四月朔日同汪我生錢季水白夢新飲王元倬先

生齋頭

南中舊友存亡半餘我數人皆老蒼却恠經年纔一晤
不知終日爲何忙桐陰偶聚當初夏茗酌相留到夕陽
小築青谿猶未遠還來共醉落花旁

壽盛茂開山人八十

潤州城外柳條新，客舍同棲意甚親。
轉眼廿年如夢寐，平頭八十尚精神。
畫成董巨方無愧，董源巨然爲江
南畫家之祖壽到黃文亦有因。
黃子久文徵
仲壽皆八十莫論此時論後世，貴人終不及山人。

內子初度

前此初度者二子
一在杭一在宛

細君歸我甫三秋，我去杭州復兗州。
兩地遙憐懸悅日，一詩先附渡江舟。
今年何幸免爲客，盡室雖貧亦不愁。
爭上似鳧鷖將數子，野塘朝夕共沉浮。

七月初三夜過周元亮先生小飲有贈

是時江南
久旱無雨

而秋熱
尤甚

今年奇熱往年無，下溼田乾井亦枯。
獨臥茅簷容懶慢，欲尋芳徑幾踟躕。
新秋見月纔相訪，涼夜開尊不待酤。

多少蒼生望霖雨
蟠龍未許戀江湖

宦海浮湛二十秋
暫歸林壑亦悠悠
吟時撫枕風生席
醉後窺簾月轉樓
有客和歌良足慰
無錢買宅不須愁
回思燕市羈孤日
此際真如蓬島遊

與王燕友銀臺感舊有贈

車笠相逢易水濱
每攜羣從

吉偶與三散四

醉蕭晨鴨江一去

皆遷客烏巷重來少
故人假寓正當秋
閣迥放懷偏與酒
徒親別時贈我菱
罌在

燕友曾以四宮杯惠予

索飲封缸不厭

頻

封缸酒名出廬州

釋褐離蔬未幾年
歷官禁近似登仙
致身卿貳亦何早
軫念漁樵各有天
世上風波多險絕
山中松桂獨蒼然
勸君且莫催征騎
也向青溪買釣船

喜錢牧齋先生惠書復寄

少年曾作虞山客親見先生半百時
稍長服膺初學集近來心醉列朝詩
琴川不遠難重到鍾阜相望一寄詞
何物腐儒蒙記憶謾勞千里報瓊枝
屈指今秋是人旬先朝耆舊更無倫
擬同詞客來爲壽却訝長書謝所親
實有羣言思就正肯當吾世失斯人
相過定在明春夏猶及磻溪垂釣辰

喜張繡虎卜居相近贈此

六朝風景在青溪烟水蒼茫路不迷
我學灌園鄰古利君來稅宅傍秋畦
袖中詩卷交相質郭外游筇每共攜
倦鳥投林隨處好湖山那定浙江西

李研齋舊史遷居秦淮過訪有贈

劔閣瞿塘歸未能廿年蹤跡滯金陵居鄰十廟鷲雖遠
步出三山街憊爭上勝恰喜新秋移水檻預知窮巷有
詩朋相過百遍休嫌數買酒無錢感又增

東李吧瞻進士

仲夏相期訪薜蘿藍輿無奈赤輪何只言伏盡暑當退
豈料秋來熱更多久旱必須時雨降小園端望故人過
知君節飲遵嚴訓自汲山泉淪茗柯

張僧持賣藥南都詩以贈之

僧持前世必高僧母腹聞腥已不勝合室長齋饒慧業
早年博物擅修能倉公文以醫方著韓伯名隨市女稱
但惜今人多嗜乳囊中薑桂日頻增

采石訪孔千一不遇

蛾眉亭下謫仙祠，曾寓其中人少知。獨有孔融頻載酒，
每懷謝朓一題詩。比年離索無由見，此日殷勤問所思。
君又出門空悵望，西江烟艇欲開時。

蕪陰訪羅原村

昔隱于湖三四秋，與君情分極綢繆。居停不遠過從慣，
飲啄隨時笑語稠。萬里風塵憐我別，重來霜雪上人頭。
江關握手何匆遽，烟水茫茫無限愁。

九江送周園客南歸兼懷元亮先生

淒淒風雨暗江關，咫尺廬峯不可攀。彭蠡濤聲憐我去，
秣陵秋色羨君還。家書煩寄荒陂上，樽酒難分逆旅間。
暇日趨庭如見問，爲言衰鬢一時斑。

元亮與千同庚，常怪予髮未白，故云。

周觀察署中喜晤倪閣公

五月君從江右還手攜吟卷扣柴關詩情澹永陶兼謝
書法精嚴歐與顏如此才華淹草澤是何年少立朝班
遵時且莫傷貧賤自有名垂宇宙間

小艇沿江上下輕南歸幾日又西行湖山一路皆詩料
羈旅終年無歎聲期我高秋來幕府就君深夜話離情
重陽作賦元嬰閣莫使王郎獨擅名

章門訪陳士業徵君

南州耆舊近蕭然碩果惟君亦可憐典冊高文傳海內
短墻破屋住江邊白頭不忍聞時事皂帽相過說往年
欲訪故人埋骨處

茂先
武子

亂山孤塚沒寒烟

正擬裁詩一贈君先投麗句與鴻文仍攜斗酒山中釀
又送爐香客裏焚歲儉不應煩地主樓高或可望江雲

菊花時節多風雨稍霽還來坐夕曛

九日雨李太虛先生以詩見招未赴

先生文筆似江河集有弇州四部多曾向隋堤窺象緯
又從蘇圃訪烟蘿談深不覺日將夕調合欣然和且歌
最是燕遊十六首篇篇吟賞愧如何

重陽風雨客心哀嘉召先期有外臺忽覩新詩同折柬
因憐叢菊許銜杯泥塗此日應難往芳徑初晴我自來
更約陳翁士爲酒伴花前襟抱一時開

重九後二日同陳士業飲李太虛先生齋頭

江城風雨悞重陽着屐難登綠野堂此日林端明霽色
特來花下就壺漿年臻大耋身猶健吟到真詩喜欲狂
聞有翠眉工度曲何時纔一奏笙簧

送周亮臣還白下

三秋同作章門客，秋盡君歸我未歸。
下水揚舠元自穩，好風掛席更如飛。
江東歲儉多收米，湖上霜寒蚤製衣。
莫歎遠遊分潤少，此方半百事全稀。

喜遇趙五絃少府

章江南望思悠悠，欲寄雙魚路阻修。
鼓柁忽從天上至，班荆先破客中愁。
故人情重那能別，小酌更殘尚未休。
且與馬融同帳臥，馬長源學博來朝風起又開舟。

贈周計百司理

洪都久客正艱辛，邂逅逢君得所親。
累夜相攜爲痛飲，扁舟許附此閒身。
嶽崎歷落真名士，憔悴支離老逸民。
邀我虔州遊自好，獨憐歲暮未歸人。

贈劉輿父兼懷伯宗先生

二十年來音覲疎，泰山梁木痛何如。生芻未束心長愧。

遺草重刊願豈虛。

予往欲選伯宗詩不果

南國偶逢烟水上，東湖

同眺雪霜初。可憐杯酒忽忽別，相約明春訪弊廬。

寄懷甯山同

山同以冠服小異其邑令將置之法賴士神力救始得免

聞君山郭遇窮奇，刑戮雖逃事亦危。此日虞羅盈草澤，

莫教鸞鶴逞威儀。三書寄我無繇荅，千里于人祇自悲。

獻歲劉生來白下，可能攜手醉東籬。

贈陳元夫別駕

元夫池州人方司贛州關稅見招之日即其初度

江鄉九子九芙蓉，君在芙蓉第幾峯。不似頑仙隱空谷，

却爲傲吏騁遊蹤。關迎嶺北雙溪水，樓對虔陽百尺松。

客到正逢初度日，梅花撲鼻酒香醲。

贈賈曜南總戎

漁陽老將舊知名六十懸車罷請纓
戰勝雙江因寄籍閒收百卉自怡情
頻來嘉客壺餐具話到先朝感歎生
邊釁實繇連帥死向來浮議賴君明

虔州旅懷

鬱孤臺下雨霏霏有客思歸尚未歸
兵過江湖舟楫少秋來京國信音稀
故人分祿情雖厚周計百司理除夕還家
願已違最是高樓相望久幾迴霜雪淚沾衣

祀竈日泊豐城之曲江胡悅之在顧舟中一宿而
別悵然有作

朔風無賴上虔灘汲汲歸與歲已殘
野泊豐城逢節序情知老友在林巒
遣書往問山家晚攜酒來過霜氣寒

話到雞鳴催解纜渡頭分手各辛酸

臨江天寧寺同半山上人守歲

歲暮歸心逐水流道逢兵馬奪吾舟
蕭灘轉權依官舍破寺容人寓佛樓
况有高僧同作客雖然除夕亦忘憂
素瓷茗飲塵襟滌不用懷鄉歎遠遊

早春歸思

以下壬寅春作

秦淮卜宅近林塘自種畦蔬滿院香
無奈絕炊逢儉歲敢辭乞食向殊方
鬱孤臺下沾膏潤新喻溪邊買稻梁
歸去江南免饑餒故人高義最難忘

五言排律

壽徐子星給諫母夫人

栢府家聲舊，梧垣氣象新。祖孫誠繼美，鞠養是何人。有母能兼父，非時失所賓。孤鸞心慘烈，雙鳳乳艱辛。授受惟班史，遷移與孟鄰。文皆成綺縠，仕卽掌絲綸。欲作調羹老，先爲補袞臣。輜軒歸子舍，滌澗奉慈親。介壽當朱夏，承恩自紫宸。杯中天露酒，階下彩衣身。章服年年易，庭幃日日春。不須頭盡白，看爾畫麒麟。

五言絕句

虔州

虔州將近粵臘日，已如春。忽見東園裏，梅花朵朵新。才看梅蕊白，又見菜花黃。自是冬無雪，何曾草不芳。

茉莉謠

章貢交流處種花如種田家家千百本爭附下江船
炎方霜雪少花葉四時青一過江東去交秋葉卽零
藤本多而賤木本少而貴朱夏花偏繁玄冬葉不替
風寒是所忌乾燥亦非宜三冬藏密室隔日記澆期
井泉令葉爛蟻穴令根傷秋分須換土烏豆汁爲良

秋蘭謠

江上逢闍僧授我種蘭法老人恐易忘書之於白帑
春喜溫畏寒夏喜陰畏熱秋喜潤畏風冬喜暄畏雪
喜雨又惡濕喜晴又惡炎久陰與烈日急徙寘深檐
灌溉取江河慎勿沾井水井水糞溺同一勺花皆死
位置尤宜高勿近螿與蚓二蟲蝕其根治以麻油餅

七言絕句

春日漫興

新水乍生江雨後，老夫徐步野橋邊。
柳條無力東風起，閒看羣兒放紙鳶。

潯江如自楚歸過白門訪予不值留札而去

端居旬月不窺園，偏是君來我出門。
千里情人坐相失，數年離思向誰言。

黃昏歸自雨花臺，汲汲尋君船已開。
底事不留茅舍宿，具餐稍待德公回。

閏七夕

秋空咫尺是銀河，一歲曾無兩度過。
今夜鵲橋人盡望，不知天上意如何。

題梅杓司藏卷

卷中乃誕北穎侯崑銅伯宗定生五亡友手札

乍開此卷卽沾巾多是當年死難人浩氣尚能凝碧血
遺言終不化青燐

余公亢烈首捐軀周沈同心亦與俱莫羨陳劉考終命
肝腸寸折眼全枯

梅生海內結交繁架上郵筒無數存獨寶數公殘翰墨
欲留書種在乾坤

贈陳未典醫士

君是龍眠一老儒近來遊藝向南都會箋仲景傷寒論
又註銅人指掌圖

卜居偏傍藏經橋過我茅齋路不遙但遇鷺花頻有約
豈因藥餌始相邀

偶向隣吏乞得斑竹數竿手植小閣西隅相訂筭
生招飲

斑竹從君乞數竿小窗風雨共高寒明年便有兒孫長
索酒來將竹母看

乍涼

門外秋風吹葛裳燈前夜雨灑藤牀回思前日熱如彼
豈料今猶有此涼

樅川夜集送從孫董次就婚六合

今夜張筵對雨牕來朝挂席下秋江不知新婦于歸後
可許人言有阿雙

阿雙妓名是時董次所狎者

湓浦訪琵琶亭

九江烟月聽琵琶千古風流此岸沙亭址尚存亭已廢

愁看楓葉與蘆花

贈胡悅之處士

是時悅之齋
文字于市

我到南昌卽問君相傳孤鶴隱雞羣
蓼洲一帶皆鹽估
此地垂簾亦異聞

賣文爲活本儒風也與君平卜肆同
只是俗人知者少
龍門反遜兔園翁

龔生畫馬鄭生蘭不救當年饑與寒
今古遺民同志操
一波三碣有誰看

眼前書法王于一地下詩情萬茂先
君實能兼二子勝
名場不著更堪憐

屈指明年是七旬
髭髯未白眼無塵
秋宵尚作蠅頭字
他日終爲鶴背人

乍見新詩卽起予從容來讀等身書莫嗟四壁貧無賴
須信千秋富有餘

夜讀白詩

門巷秋陰斷往來堦除晚霽獨徘徊消愁唯有香山集
夜夜燈前當酒杯

豐城

喜鵲灣頭泊野航仰看星漢澹無光張華雷煥今何在
雖有龍精氣亦藏

新淦

陶公曾有外家親此日全無姓湛人試出東門聊騁望
讀書臺已歷千春

陶桓公母湛氏本淦人公幼隨其母讀書于淦至今有陶公讀書臺存

野泊

空江逢雨又逢兵，野泊孤洲已二更。
喜見人家隔溪語，愁聞風霰打篷聲。

峽江

冬月南風分外多，舟師買客歎蹉跎。
峽江數里猶難上，十八灘頭奈爾何。

吉水

西江山好是匡廬，除却匡廬盡不如。
吉水城邊多秀色，千峯亦似畫屏舒。

百家村

上下章江千里遙，舟人到此必停橈。
家家俱有妻孥在，任急須淹一兩宵。

惶恐灘

十八灘頭第一灘灘名惶恐膽先寒臨流忽憶文山句
千古忠臣淚不乾

題劉紫涼山人品泉圖

甘泉香茗勝醍醐不信前人喚酪奴試問天街騎馬客
一生曾飲一杯無

題周計百司理二影

一訪張道遙圖一訪古雲師

逍遙辟穀隱西山與虎同居石洞間不是君身有仙骨
誰能扶策扣柴關

焚香相對欲忘言髣髴坡公與了元他日重遊翠巖寺
也須玉帶鎮山門

翠巖古
雲所居

去虔州日曾青藜趙國子攜酒舟中相送且留余

次日看春口占謝之

虔陽歲暮有歸人二仲提壺到水濱此地交遊非不衆
布衣獨與布衣親

酒酣臨別又徘徊勸我舟師且勿開明日迎春風俗好
相期重上鬱孤臺

題半山道人畫冊

白嶽高僧有漸江丹青妙手世無雙宛溪復有半山子
畫苑新開兩法幢

一着袈裟絕萬緣獨餘破研習難捐江山本是無情物
寫到荒殘亦可憐

題尚白所藏徐青藤畫冊

山陰高士謫仙人書畫詩詞並絕塵不是使君誰解此
朝朝相對墨痕新

壽宛陵李翁

以下壬寅春作

元日蕭灘遇李翁髭髯如雪貌如童問君導引遵何術
家在陵陽古洞中

聞說仙人竇子明釣竿曾掣白龍行此溪泉冽今爲酒
飲酌能令兒齒生

翁居水陽有龍溪且善釀故云

題郭生卷

敬亭山下有芳村誰錫嘉名畫水園正羨主人能石隱
却疑歲暮向江門

昔人畫水須十日半公渲染不須更何年買棹來尋汝
僥倖將身入此圖

卷乃半山道人作

題就亭圖

亭在尚白署中半山卽畫于壁

官舍爲亭小不妨城中城外兩相望異時墨蹟傳千古

金山續集

西江遊草

三十

便是黃州舊雪堂

章江曉發

春水未生天氣寒
愁風愁雨復愁灘
打頭風雨晴猶易

閣淺沙洲活最難

打音頂

舟中望廬山有懷舊遊

番湖掛席見匡山
來去匆匆俱不閒
却羨當年多逸興
冬春長住落星灣

聞李宗伯家伎並遣傷之

霓裳一部本羣仙
祗合文人與結緣
底事同歸廝養卒
酸風腥雨哭婵娟

聞說登臚涕淚頻
烟波迴雪更悲辛
章江遊子腸先斷

况是虔州納采人

烟波迴雪二伎名虔州友人曾以千金聘烟波不可得

竹枝詞 十首

尚白方選刻西湖竹枝詞徵子作子舊稿不存舟中適有所思遂書以應之不必切西湖也

送郎江上藕花開
說道還家看早梅
如今桃李俱飄落
柳絮將飛郎未回

儂家住在大江東
妾似船梳郎似蓬
船梳一心在蓬裏
蓬無定向只隨風

樓上春風吹小牕
愁人獨坐俯晴江
沙鷗汀鷺皆成匹
豈獨鴛鴦是一雙

春水新添幾尺波
泛舟小婦解吳歌
笑指儂如江上月
團圓時少缺時多

愁損朱顏瘦損肌
多時明鏡懶相窺
香奩拋却青螺黛
不是郎歸不畫眉

貧家艱食况年荒升斗于人亦可傷若是妾飢寧自忍
不教郎獨去他鄉

聞郎歲裏在江門詩滿奚囊酒滿樽主人留客情雖厚
畢竟難如伉儷恩

二月揚帆贛水濱攜來茉莉未全貧郎歸豈獨儂心喜
贏得羣花香四鄰

十日順風郎到家香秔百斛更堪誇山廚從此饒饘粥
誰復飄零楚水涯

杯酒洗塵三月三不須修禊向江潭手種萱花無限好
忘憂已足况宜男

改龔山續集後

有明著作最權奇熙甫文章爾止詩

予嘗謂太僕古文龔山詩皆淡不可

及淡處儘教耐思索太羹元酒少人知

龍眠風雅廣摛羅惜載龔山詩不多倘得盡刊前後集
流傳遠近更如何

李錦唐瓢委蠹虫一朝傳播始江東元來思肖無佳壻
祇合沉埋胥井中

附

龔山先生以己酉之秋歿于蕪陰客有爲乩卜之
術者先生降焉曰吾淮西山人方某也叩以冥府
事不答題詩曰平生詩酒是生涯老死江干不憶
家自入黃泉無所見冥官猶戴舊烏紗題罷擲筆

而逝一時江南北傳誦以爲詞致閒適襟懷瀟灑
非先生必不能爲此詩予爲吟歎累日援筆和之
浪遊踪跡總天涯客死江湖卽我家知爾心憎武靈服
喜從冥府見烏紗

王子安節以金山續集見貽卽效金山体賦以志

感

吏部上書燒佛骨拾遺廷諍却沉香

唐李漢字南紀少
事韓愈通古學屬

詞雅蔚剛方亦類愈愛重以子妻之敬宗朝官拾遺
船賈獻沉香亭村漢諫却之愈歿漢爲表其文集行世

當時風義成冰玉歿後詩文賴表章每惜金山無嗣子
誰知天壤有王郎捐資更欲刊前集李漢焉能獨擅場

木厓潘江蜀藻氏題